

Oqaasiliortut ataatsimiinnerat

Pingasunngorneq, novembarip 21-ianni 2012, nal. 10.00
Oqaasileriffimmi.

Peqataasut: *Carl Chr. Olsen, Stephen Heilmann, Karl Møller aamma Katti Frederiksen.*
Napparsimalluni peqataanngilaq: Lotte Holm
Eva M. Thomassen angalammat sinniisoq peqataavoq.
Allatsi: *Katti Frederiksen*

Oqaluuserisat:

1. Tikilluaqqusineq aamma ilisimatitsissutit
Oqaluuserisassat taamaatillugit akuerineqarput, ilassutigaluguli eqqartuussivimmi nutserisuunerup Rosa Reimarip ataatsimeeqatigisimaneranit ilisimatitsissutissat eqqartugassallu. Taakkua oqaluuserisassatut kingullertut inissinneqarput.

Siulittaasoq tikilluaqqusisoqarpoq, ilisimatitsissutigalugulu ORDBOGEN nutaamik kalaallisut ateqalerluni saqqummilermat, tassalu OQAASERSIUUT. Naqqeqqinneqalernerani Oqaasiliortut oqaatsit akuerisaat ilanngunneqarsimasut aamma oqaatigaa.

2. Kingullermik ataatsimiinnermit imaqarniliap akuerineqarnera
Taamaatillugu akuerineqarpoq.

3. Saaffiginnissutit:

- a) bekymringsbarometer kalaallisut taaguuserneqarpoq

ernumanassutsimut uuttuut

- b) e-bogip taaguutaanut qisuariaat.

Taaguutaata akuerisap allanngortinneqarani atuinneqarnissaa aalajangiusimaneqaannarpoq: **atuagaq qarasaasiarmiu**. Aniatinneqassappat tassaaliinnassaaq atuagaq qarasaasiameersoq, kisianni e-bogip isumaanut, tassalu sukkulluunniit aaneqarsinnaasuuneranut naapertuuttumik taaguuteqarnera naqissuserneqaannarpoq, soorluttaarmi aamma *atuakkiamik* oqartartugut naak immaqa suli atuaganngortinneqarluni naqinneqanngikkaluartoq. E-bogip tamanna pissuseqatigiinnaraa Oqaasiliortut isumaqatigiissutigaat.

- c) 'stævning' kalaallisut suliassanngortitsissut imalt. aqqeqqusissut?

Taaguut stævning eqqartuussisoqassatillugu aggeqqusisoqartarneranut, aammali inatsisitigut suliassanngortitsisoqarneranut tunngassuteqarpoq. Oqaasiliortut isumaqarput eqqartuussisarneq pillugu aammalu pinerluttulerinermut inatsit pillugit nalilersuisoqalernerani taaguut matumani pineqartoq aamma ilanngunneqarumaartoq.

Eqqartuussiveqarnermut tunngasut taaguutit pillugit oqaluuserisassat immikkoortoq 4-mi qupp.3-mi tikinneqaqqipput.

d) sundhedsforsikring kalaallisut taaguutigilerpaa
nakorsarneqarsinnaanissamut sillimmasiineq

e) App-simut qisuariaat.

Oqaasiliortut kingullermik ataatsimiinnerannit aalajangiunneqarpoq app/apps kalaallisut aaneqarsinnaasunik taaneqassasut. Tamanna taaguut pillugu qisuariartoqarpoq app/appsit suusinnaanerini aamma nassuiaalluni, taaguullu tamakkiisuunnginnerarlugu. Taamatut qisuariaat paasillugu, aammali app/appsit maanna allanngortinnagu amerlasuunit atugaalereernera pillugu internationaliusumik taaguinnarnissaa aalajangiunneqarpoq, imaattussanngorlugu: **app**, qasseersiutinngorlugu **app-it**.

f) legat kalaallisut **taperneqaat**. Taakkua suusinnaappulluunniit; aningaasat, najugaqarnermut/nerisaqarnermut/angalanermut taperneqaatit il.il.

g) fotosyntese kalaallisut oqaasersiatut atorneqarsinnaavoq ima nassuiaaserlugu:
qaamanikkut pilersoqarneq

h) ualimut/ualeru, unnummut/unnugu

isumaasa assigiinnginnerat pillugu Oqaasiliortut siunnersuipput KNR-ikkut aallakaatitassanik nassuiaalluni ilisimatitsinikkulluunniit ualeru atorneqartassasooq, assersuutigalugu: ualeru nalunaaqutaq pingasunut aallakaatinneqassaaq: X.X.

Taamatut nalunaaquttamik aalajangersimasumik taasaqarnermi piffissami killiligaasumi aallakaatitsisoqarnissaanik ilisimatitsineri *ualeru* imaluunniit *unnugu* atorneqassapput, assersuutigalugu unnugu radioaviseqareerpat aallakaatinneqassaaq x.x.

Ilanngullugu saaffiginnittumut nassiunneqassaaq ullumi/ullumikkut pillugit Oqaasileriffimmit akissusiaq.

i) droner kalaallisut **timmisartooq inuttaqanngitsoq**.

j) qusii oqaaseq tunumiusoortuuvoq Villads Villadsenip tunumi inuusuttuullunilu najugaqarnikup taalliamini ilaatillugu allataa. Tassani taalliortutut kiffaanngissutsi atorlugu sumiorpaluummik ilanngussisimavoq, kitaamiusut isumaqartoq *naaja*.

k) ersarissooq – ersagissoq

Oqaatsit assiigiinngitsuupput marluk. Siulleq ersarissooq tassaavoq paasiuminartooq, erseqqissoq silamut tunngatillugu atorneqaraangami silap isiginiarnerani akornutissartaqanngitsutut paasineqartarpoq. Ersagissoq

taakkununga attuumassuteqanngilaq kiinnami ulussat ataatungaannut kigutit inissisimaffiisa nalaannut taaguutaammat.

l) katitarpoq oqaasiunngilaq immikkut isumalik.

m) æggeur, teæg aamma planet kalaallisut ima taaguuserneqarput:

æggeur – **minutsilersuut**

teæg – **misutsissut**

planet – **planet**

n) heldagsskole kalaallisut **ulloq isukkaarlugu atuarfik.**

o) simultan tosprogethed il.il.

Oqaasilerisunit siunnersuusiorfigineqassapput, taakkununga assingusut

Oqaatsinut politikksamut nassuiaammiittut ilanngunneqarumaarput, ilaatigut makkuusut:

individuel tosproget – marlunnik oqaasilik (inuk ataaseq)

balanceret tosproget – oqimaaqatigiissumik marlunnik oqaasilik

domineret tosproget – illuinnarmik marlunnik oqaasilik

naturligt tosproget – pissusissamisut marlunnik oqaasilik

p) halvkonserves - **asiunaveersakkat matoqqittakkat**

4. Eqqartuussiveqarnermi taaguutit

Oqaasileriffik eqqartuussivimmi nutserisuuneq peqatigalugu ataatsimeeqateqa-reerneranni Oqaasiliortut suleqatiserineqarput ataatsimiititaliornissamik. Tassani eqqartuussisarnermi pinerluttulerinermilu inatsisit misissoqqissaarneqarlutik kalaallisut allassimaneri taaguutillu atugaasut nalilersoqqissaarneqassapput. Suleqatigiissitaq Oqaasiliortunit Oqaasileriffimmilu atorfilinnit (CCO aamma KF), eqqartuussivimmi nutserisunik, inatsisilerituumit pisariaqarpallu aamma eqqartuussisumik illersuisumilluunniit ilaqarluni suliarineqassaaq. Tamatumunnga Rigsombud saaffigineqassaaq, aningaasatigullu tapeeqataasinnaanissaanik tusarniaaffigalugu.

Suliassaq manna aalajangiunneqartoq siulittaasup Naalakkersuisumik Mimi Karl-senimik ataatsimeeqateqaleruni eqqaassallugu neriorsuivoq.

5. Allat

Hovedordklassinut taaguutit aammalu marluinnik oqaasillit pillugit taaguutit assigiinngitsut oqaasilerisunit eqqartorneqariarlutik taaguuserneqassasut

Oqaasiliortut isumaqatigiipput, piareerpatalu akuerineqartussatut Oqaasiliortunut ingerlateqqiinnarlugit.

Inussiarnersumik inuulluaqqusilluta

Carl Chr. Olsen

Siulittaasoq

Katti Frederiksen

Allatsi